

तुबारि संपादकीय
टीम

◆अस इ उम्मिद करूं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पढ़ू जे इ पत्रिका शुरू किओ सि।

◆तुबारि एक अवाणिज्यिक पत्रिका भो।

◆तुबारि पत्रिका कोइ मेहणु, जनजाति, त संस्कृति गलित कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆छपाणे पहिले सोभ आर्टिकल दुई टाई पांगेई मेहणु हरालो असे। इ त खुलि बोक असि कि पहिल बार पांगवाड़ी लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल ना मिलएल, या घाटि मेहणु के मदद ना मिलएल त तुबारि पत्रिका कदि बि बंद भुई सकति।

◆कोइ चिज छपां सि या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार राखे ठेके भेड़ हरिरामे दुकान अन्तर तुबारि ड्रॉप बॉक्स पुठ बि अपुं सजाव ओर आर्टिकलस रखुं जे सुविधा किओ असि।

◆अस सोभि पांगि मेहणु जे हात जोड़ कई निवेदन कते कि, तुस बि कोइ अछा आर्टिकल, पुराणि या नौई कथा, कहावत, कविता, त नौवे घीत (पांगवाड़ी अन्तर) लिख कइ छपां जे हेंबदे दिए।

तुबारि संपादकीय टीम

☎ 9418431531

☎ 9418429574

☎ 9418329200

☎ 9418411199


☎ 9418411599



अराख पीणे कि असर भुन्ता ?

हे पंगेइ अन्तर इस टाइम सुआ मेहणु अराख पीण लगे असे। अराख पीण अब मेहणु के आदत बण गओ असी। तन्के अदत बदलण सुआ मुशकिल भोइ गओ असी। अराखे पीणे बइ हे शरीर, टबर, रिश्तेदारी त ग्रां अन्ही सोभी पुठ सुआ असर भुन्ता।

अराखे पीणे बेलिये हें जिसम अन्तर कीं-कीं भुन्तु? अराख पीणे बइ हें काजा खराब भोइ घेन्ता त कैसर बी भोइ सकता। जे जिल्हणु अराख पींती तन्ही बी कैसर भुणे सुआ खतरा असा। रोज अराख पीणे बोलि बी:पी सुआ चड़ घेन्ता त दिले दौरा बी भुणे खतरा सुआ असा, हे पंगेइ सुआ मेहणु असे करण जोइ मठइ उम्र अन्तर मरण लगे असे। अराख पी कइ जपल लाग चड़ती त तिखैइ तन्ही पता इ न लगता, से होरी जिल्हणु या मड़द जोइ सम्बन्ध बडाइ छते, तसे बेलि एच:आइ:बी भुणे बी सुआ खतरा भुन्ता। अराख पीणे बाड़ी के फेफड़े बी खराब भोइ घेन्ते।



अराख पीणे आदति मेहणु के जिसम अन्तर अति बीमारी ऐइ सकती से तन्के इन्ही आदति पुठ ऐन्ती, कत पींते त कत लिग पींते? कत उम्र केंआ पीण लगे असे? तस पीण कत साल भोइ गई? जिखैइ से पेठ थिआ तिखैइ तसे ई अराख पींतीथ न?

अराख पीणे आदत बाड़ी मेहणु कीं-कीं भुन्तु? सुआ अराख पीणे मेहणु के दिमाख कमजोर भोइ घेन्ता, तन्ही ठरख

लगती, से अरखे बगे बिशि न सकते। जे मठइ उम्र केंआ अराख पीण शुरू कते तन्के यादाश कमजोर भोइ घेन्ती, तन्के वर्ताब बी खरा न भुन्ता। अराख पीणे बाड़ी मेहणु के जिन्दगी अन्तर सुआ मुशकिल ऐइ घेन्ती, से सुसर हठ न बठते, बोक सुसर न करींती, तन्ही सुसर केतू बी नउ त यके मिन्ट अन्तर बीसरी घेन्ते। तस सुसर फैसला नेण न ऐन्ता। तन्ही पता इ न लगता से अपु बश अन्तर न भुन्ते। शराबी हथ, खुर अराख पी कइ सुसर न चलते। अराख पीणे बाड़े ड्राइवर पी कइ गाड़ी चलातें तन्के ऐक्सीडेन्ट भोइ घेन्ता।

अराख परिवार त समाज अन्तर हें हालत कीं कता। अराखे मेहणु अपु कमेइ केआ सुआ पींते, त होरी केआ उधार नेंते, तउ तन्ही सुआ रण भोइ घेन्तु। अराखे मेहणु अपु कमाइ पुठ ध्यान न देंते, नौकरी बाड़ी के नौकरी, दुकानदारी के दुकान त मजदुरी के धियड़ी बी मठे-मठे घेई घेन्ती। अराखे मेहणु के सुसर कमाइ न भुणे बझाइ जोइ तन्के गभुर स्कूल सुसर घेई न बठते, गभुरू मजदुरी करीण ऐन्ती। गभुर पुठ सुसर ध्यान न देन्ते त तन्के गभुर बिगड़ घेन्ते। अराख पीणे बाडा रोज अपु टबर जोइ झगड़िता त मडीता से सुआ बेसेइते त अपु जुएलि पुठ शक कता। तस बझाइ जोइ तसे टबरे लज्ज भोइ घेन्ती त तन्ही बहारी घेण शर्म लगती, से टबरा अकेला भोइ घेन्ता, कोओ तन्के रोज-रोज मदद बी न कते। से सुआ गरीब भोइ घेन्ते। शराबी कोत खोपर त नडी अन्तर झडो भुन्ता। जिखैइ तन्ही केइ अराख पीण जे रूपेइ न भुन्ते से गिहा समान चोर कइ बेच छतें। अराख पी कइ मेहणु सुआ गलत कइ छतें, जी कसेरी बालत्कार करण, अपेपु बुद्ध मडीण त मडि-मडि एक होरा मार बी छतें।

सुआ अराख पीणे बाड़े अगर अपु मर्जी जोइ अराख पीण छड़ी देंण चाहन्ते त छड़ी दी सकते। इ मेहणु नशा निवारण केन्द्र(De-Addiction Center) घेइ सकते। नशा निवारण केन्द्र अन्तर डेड महेने केंआ छ महेन तक ईलाज करण जे तठि बिशुण ऐन्तु।

रोज अराख पीणे बोलि बी:पी सुआ चड़ घेन्ता त दिले दौरा बी भुणे खतरा सुआ असा, हे पंगेइ सुआ मेहणु असे करण जोइ मठइ उम्र अन्तर मरण लगे असे।

यक मैना थी। तस नउ मिनी थियु, तसे छख थी, त गी सोब खुश थिए। कुनकुन घुगी, पीकू कुख त ततलू तोता घीत ला गलो थिए। मोनू मोर त मीनू मोरणी नचण लगो थिए। ग्रां सोब सियाणे त उल्लू मिया, गबगब हाथी, शेर खान सोब जेइ कओठि अन्तर यक कना बिश कइ नरे पीण लगो थिए। भीखू बंदर त भोलू गघा सुआ हल्ला करण लगो थिए, तन्ही बोडी केआ गियअ बी लगतीथ। सोब सुआ खुश थिए। तन्के कुइ अपु धणी गी घेन्ती, इ सोच कइ मिनी बोउ खुश बी थिआ त उदास बी थिआ। अब हे दुवा केइ मठु-मठु घुगरु लइ कइ कोउ उछडता? इ सोचण लगो थिआ कि मिनी इ अपु धणी भेइ बोलण लगी, शुणते न मिनी बोउआ! बराती के स्वागते तयारी कइ छडी न? मिनी बोउए झट अपु टीर धुशे त मुस्कराइ कइ बोलू अ मिनी ईआ। तिखेइ भोला भालू दौइ देन्ता अन्तर आ त मिनी बोउ जे बोलू, बबुजी सुआ गइबइ भोइ गई। जे तुसी बराती के चहा जे दुध मगोओ थियु से फट गओ। अब होर दुधे इन्तजाम करण ऐन्ता। "मिनी बोउ सोच अन्तर घेइगा। भोलू! अब अत झठ दुध कोडिया अणु?" सोब सोचण लगे। तिखेइ उल्लू मियाँ दम देन्ते-देन्ते बोलू। भोइ सकतु गौरी गोउडा, भूरी भैंस, बीनू बकरि हे मदद करिएल। गौरी, भूरी त बीनू जि सोब बोक शुणी त से बोलण लगी मिनी हे बी कुइ भो। तुस दुधे चिन्ता छड दिए। फिर कि थियू! अतू दुध भू कि सोभी चहा त दुध पियू होर जलेबी बी खेइ। छख बडिया धुम-धाम जोइ भोइ गई, सोब खुश थिए, खुशी-खुशी जोइ सोब खाइ-पी कइ अपु गी जे घेइ गअ।

कुछ खास खबर

◆ वन एवं मत्सय मन्त्री श्री ठाकुर सिंह भरमौरी पंगेइ दोरे पुठ अओ असा, तन्ही पंगेइ किसान मेला मना।

◆
◆


यक जैल अन्तर जेलर कैदी जे बोलुण लगो असा....

बबीता



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

अपपु बुच सुसर विश्वास जोइ बिशेल.....??



एडस मेहणु के जिसम अन्तर कम से कम 7 केआ 10 साल तक कोइ लक्षण नजर न ऐन्ते। एडस बीमारी इन्सान जोइ यक लिंगि सम्बन्ध बनाणे बोलि कसे बी एडस एइ घेन्ता। कुछ मेहणु इ बोते कि काँडोम सुसर लाल ता एडस बीमारी न लगती। काँडोम सिर्फ 18% सुरक्षा कता। काँडोम सिर्फ लिंगे सुरक्षा कता, ओत-कोत, अडंकोष त छोडी सुरक्षा न कता। समस्या असी कि लिंगे ओत-कोत, पेट त जंघी के बीची छोडी पुठ झठ बीमारी शचि घेन्ती, जसे बोलि खुरक लगती त खशोरि घेन्तू। एडस किटाणु खशोरिए छोडी त खेडे बइ बी इन्साने जिसम अन्तर घेइ घेन्ते। एडस बीमारि जे कोइ ईलाज या टीका नेइ। काँडोम एडस केआ बचणे तरीका न भो, एअ तरीका झूठा असा। एडस बीमारि केआ बचणे सिर्फ यके तरीका असा, से अस अपु ब्याह तक त ब्याह केआ पता बी यौन परहेज करण। अगर दुहए बियाहे बाडे इन्सान अपपु बुच सुसर विश्वास जोइ बिशेल त यौन सम्बन्धी के करण तन्ही कपले बी एडस न भुन्ता।